

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১০/২০১৭

ঢাকা, সোমবার ৫ জুন ২০১৭, ২২ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। সমগ্র উপকূলীয় অঞ্চলে সুন্দরবন বিস্তৃত হবে : প্রধানমন্ত্রী
- ২। বিশ্ব পরিবেশ দিবস আজ
- ৩। বাজেটে কোনো সমস্যা থাকলে সমাধান হবে : সাংবাদিকদের ইফতার অনুষ্ঠানে প্রধানমন্ত্রী
- ৪। লন্ডনে সন্ত্রাসী হামলার ঘটনায় প্রধানমন্ত্রী শেখ হাসিনার নিন্দা
- ৫। রাজস্বাটির লংগদুর ঘটনায় জড়িতদের ছাড় নয় : স্বরাষ্ট্রমন্ত্রী
- ৬। দুর্নীতিমুক্ত সমাজ গঠনে কাজ করতে হবে : শিক্ষামন্ত্রী
- ৭। দেশের ৫৬টি ইউনিয়ন পরিষদে ভোট আগামী ১৩ জুলাই
- ৮। ইউনেস্কোর সাংস্কৃতিক বৈচিত্র্য রক্ষা সম্মেলনে বাংলাদেশ সভাপতি নির্বাচিত
- ৯। রপ্তানিমুখী শিল্পের উন্নয়নে ১০ কোটি ডলার ঋণ অনুমোদন বিশ্বব্যাংকের
- ১০। পাবনায় ৭ জন অ্যানথ্রাক্স আক্রান্ত

১। সমগ্র উপকূলীয় অঞ্চলে সুন্দরবন বিস্তৃত হবে : প্রধানমন্ত্রী

প্রধানমন্ত্রী শেখ হাসিনা বলেছেন, সুন্দরবন যে আমাদের একটা ঐতিহ্য শুধু তাই নয়, এই সুন্দরবনের কারণেই কিন্তু বাংলাদেশ টিকে আছে। এই সুন্দরবন যাতে আরো বৃদ্ধি পায় সেজন্য আমরা আর্টিফিসিয়াল ম্যানগ্রোভ সৃষ্টির উদ্যোগ নিয়েছি। সাথে সাথে উপকূলীয় অঞ্চলে এর বিস্তৃতি ঘটাবার জন্য ইতোমধ্যে নির্দেশনা দেওয়া হয়েছে। সুন্দরবনের জীব-বৈচিত্র্য রক্ষায় সরকার বিভিন্ন পদক্ষেপ নিয়েছে বলেও তিনি জানান। প্রধানমন্ত্রী গতকাল ৪ জুন রোববার বঙ্গবন্ধু আন্তর্জাতিক সম্মেলন কেন্দ্রে পরিবেশ ও বন মন্ত্রণালয়ের উদ্যোগে বিশ্ব পরিবেশ দিবস ও জাতীয় বৃক্ষরোপণ অভিযান এবং পরিবেশ মেলা ও বৃক্ষমেলা ২০১৭ উপলক্ষে আয়োজিত অনুষ্ঠানে প্রধান অতিথির ভাষণে এসব কথা বলেন। সূত্র-ইত্তেফাক (পৃ.১,ক.৮), জনকণ্ঠ (পৃ.১,ক.২), ডেইলি সান (শেষ পৃ.,ক.২), ডেইলি স্টার (পৃ.১,ক.১)।

২। বিশ্ব পরিবেশ দিবস আজ

আজ বিশ্ব পরিবেশ দিবস। এ বছর দিবসটির প্রতিপাদ্য নির্ধারিত হয়েছে ‘প্রাণের স্পন্দনে, প্রকৃতির বন্ধনে’। ১৯৭২ সালে জাতিসংঘের মানবিক পরিবেশ সংক্রান্ত আন্তর্জাতিক সম্মেলনে গৃহীত সিদ্ধান্ত অনুযায়ী জাতিসংঘের পরিবেশ কর্মসূচির (ইউএনইপি) উদ্যোগে প্রতিবছর সারা বিশ্বের একশটিরও বেশি দেশে ৫ জুন ‘বিশ্ব পরিবেশ দিবস’ হিসেবে পালন করা হয়। বিশ্বের অন্যান্য দেশের মতো বাংলাদেশেও বিশ্ব পরিবেশ দিবস উপলক্ষে সরকারি ও বেসরকারি বিভিন্ন সংগঠন নানা ধরনের কর্মসূচি পালন করবে। দিবসটি উপলক্ষে রাষ্ট্রপতি মো. আবদুল হামিদ ও প্রধানমন্ত্রী শেখ হাসিনা পৃথক বাণী দিয়েছেন। সূত্র-সংবাদ (শেষ পৃ.,ক.১), সমকাল (পৃ.২,ক.৫), নিউজ টুডে (পৃ.৩,ক.২), ডেইলি সান (পৃ.২,ক.১)।

৩। বাজেটে কোনো সমস্যা থাকলে সমাধান হবে : সাংবাদিকদের ইফতার অনুষ্ঠানে প্রধানমন্ত্রী

২০১৭-১৮ অর্থবছরের প্রস্তাবিত বাজেটে কোনো সমস্যা থাকলে আলোচনার মাধ্যমে তা সমাধানের ইঙ্গিত দিয়েছেন প্রধানমন্ত্রী শেখ হাসিনা। গতকাল ৪ জুন রোববার জাতীয় প্রেসক্লাবে সাংবাদিকদের ইফতার ও দোয়া মাহফিলের এক অনুষ্ঠানে ভাষণ দেওয়ার সময় তিনি বলেন, ‘বাংলাদেশের ইতিহাসে সর্ববৃহৎ চার লাখ ২৬৬ কোটি টাকার বাজেট আমরা দিয়েছি। এ বাজেট নিয়ে অনেক আলোচনা চলছে। বাজেটে কারও কোনো সমস্যা থাকলে সংসদে আলোচনা হবে। আলোচনার মাধ্যমে তা সমাধান করা হবে।’ সূত্র-সমকাল (পৃ.২,ক.১), প্রথম আলো (পৃ.২,ক.৪), ইন্ডিপেন্ডেন্ট (শেষ পৃ.,ক.৭), নিউজ টুডে (শেষ পৃ.,ক.৬)।

৪। লন্ডনে সন্ত্রাসী হামলার ঘটনায় প্রধানমন্ত্রী শেখ হাসিনার নিন্দা

প্রধানমন্ত্রী শেখ হাসিনা লন্ডন ব্রিজ ও বরো মার্কেটে বর্বরোচিত হামলার তীব্র নিন্দা জানিয়েছেন। ওই হামলায় সাতজন নিহত ও ৪৮ জন আহত হয়। ব্রিটিশ প্রধানমন্ত্রী থেরেসা মে’র কাছে পাঠানো এক বিবৃতিতে প্রধানমন্ত্রী শেখ হাসিনা নিরপরাধ ব্যক্তিদের ওপর এই বর্বরোচিত হামলা ও হত্যাকাণ্ডের ঘটনায় গভীর শোক প্রকাশ করেছেন। প্রধানমন্ত্রী বলেন, ‘আমরা এহেন নির্বোধের ন্যায় কাপুরুষোচিত কাজের কঠোর নিন্দা জানাচ্ছি। আমরা যুক্তরাজ্যের জনগণের প্রতি সংহতি জানাই’। ব্রিটেনের প্রধানমন্ত্রী ও যুক্তরাজ্যের জনগণের প্রতি গভীর সমবেদনা জানিয়ে প্রধানমন্ত্রী শেখ হাসিনা বলেন, ‘এই কঠিন সময়ে শোকাহত পরিবারগুলোর প্রতি আমাদের সহমর্মিতা ও প্রার্থনা রইল’। সূত্র-সংবাদ (পৃ.১,ক.৪), জনকণ্ঠ (পৃ.১,ক.৪), ডেইলি সান (পৃ.৩,ক.১)।

৫। **রাজ্যমাটির লংগদুর ঘটনায় জড়িতদের ছাড় নয় : স্বরাষ্ট্রমন্ত্রী**

স্বরাষ্ট্রমন্ত্রী মো. আসাদুজ্জামান খাঁন কামাল বলেছেন, রাজ্যমাটির লংগদুরে পাহাড়ীদের ঘরবাড়িতে আগুন দেওয়ার ঘটনার সঙ্গে জড়িত ৩০০ জনের বিরুদ্ধে মামলা হয়েছে। এরই মধ্যে ১২ জনকে গ্রেফতার করা হয়েছে। বাকিদের গ্রেফতারের চেষ্টা চলছে। এ ঘটনায় দোষী কাউকে ছাড় দেওয়া হবে না। গতকাল ৪ জুন রোববার সচিবালয়ে আয়োজিত সংবাদ সম্মেলনে তিনি এসব কথা বলেন। স্বরাষ্ট্রমন্ত্রী আরো বলেন, রমজান ও ঈদকে কেন্দ্র করে আইনশৃঙ্খলা বাহিনীর তৎপরতা বাড়ানো হয়েছে। উদ্ভূত যে কোনো পরিস্থিতি মোকাবিলায় আইনশৃঙ্খলা রক্ষাকারী বাহিনী প্রস্তুত রয়েছে। এছাড়া ব্যবসায়ীদের আবেদনের পরিপ্রেক্ষিতে রাজধানীর বিভিন্ন মার্কেট ও বিপনিবিতানের নিরাপত্তা বাড়ানো হয়েছে। সূত্র-যুগান্তর (পৃ.২,ক.৪), সংবাদ (পৃ.১,ক.৫), নিউজ টুডে (শেষ পৃ.,ক.৪), ডেইলি সান (পৃ.২,ক.২)।

৬। **দুর্নীতিমুক্ত সমাজ গঠনে কাজ করতে হবে : শিক্ষামন্ত্রী**

শিক্ষামন্ত্রী নুরুল ইসলাম নাহিদ বলেছেন, একটি দুর্নীতিমুক্ত, ন্যায্যভিত্তিক ও শুদ্ধাচারী সমাজ গঠনের লক্ষ্যে সবাইকে আন্তরিকতার সঙ্গে কাজ করতে হবে। উন্নতির ভাগ যাতে সব মানুষ সমানভাবে পায়, সেজন্য সবাইকে সততার সঙ্গে দায়িত্ব পালন করতে হবে। সমঅধিকার, মর্যাদা ও সুযোগ নিশ্চিত করতে শুদ্ধাচারের বিকল্প নেই। গতকাল ৪ জুন রোববার রাজধানীর ইন্সটিটিউট অব ডিপ্লোমা ইঞ্জিনিয়ার্স বাংলাদেশ (আইডিইবি) অডিটরিয়ামে জাতীয় শুদ্ধাচার কৌশল বাস্তবায়নে সরকারি কর্মকর্তাদের অঙ্গীকার বিষয়ক কর্মশালায় প্রধান অতিথির বক্তৃতায় মন্ত্রী এসব কথা বলেন। শিক্ষা মন্ত্রণালয়ের কারিগরি ও মাদ্রাসা শিক্ষা বিভাগ এ অনুষ্ঠানের আয়োজন করে। সূত্র-যুগান্তর (পৃ.১৭,ক.৮), সমকাল (পৃ.১৯,ক.১), নিউজ টুডে (পৃ.২,ক.২)।

৭। **দেশের ৫৬টি ইউনিয়ন পরিষদে ভোট আগামী ১৩ জুলাই**

দেশের ৫৬টি ইউনিয়ন পরিষদে আগামী ১৩ জুলাই ভোট গ্রহণের দিন নির্ধারণ করে তফসিল ঘোষণা করেছে নির্বাচন কমিশন (ইসি)। এর মধ্যে ২৩টি ইউনিয়ন পরিষদে সাধারণ নির্বাচন অনুষ্ঠিত হবে। বাকি ৩৩টি ইউনিয়ন পরিষদের মধ্যে ৭টিতে চেয়ারম্যান পদে ও অন্যগুলোতে বিভিন্ন পদে উপনির্বাচন অনুষ্ঠিত হবে। গতকাল ৪ জুন রোববার নির্বাচন কমিশনের এক বিজ্ঞপ্তিতে এসব তথ্য জানানো হয়েছে। ঘোষিত তফসিল অনুযায়ী, নির্বাচনে মনোনয়ন পত্র দাখিলের শেষ দিন ১২ জুন, মনোনয়নপত্র যাচাই-বাছাই ১৪ জুন ও প্রার্থিতা প্রত্যাহারের শেষ দিন ২১ জুন। সূত্র-যুগান্তর (পৃ.২,ক.১), ইত্তেফাক (পৃ.১৭,ক.১), বাংলাদেশ টুডে (শেষ পৃ.,ক.৫), অবজারভার (পৃ. ৩ ক.৬)।

৮। **ইউনেস্কোর সাংস্কৃতিক বৈচিত্র্য রক্ষা সম্মেলনে বাংলাদেশ সভাপতি নির্বাচিত**

প্রথমবারের মতো ইউনেস্কোর সাংস্কৃতিক বৈচিত্র্য রক্ষা ও এর উন্নয়ন বিষয়ক সম্মেলনে বাংলাদেশ সভাপতি নির্বাচিত হয়েছে। ইউনেস্কোর সদর দফতর প্যারিসে আগামী ১২ থেকে ১৫ জুন পর্যন্ত অনুষ্ঠেয় ৬ষ্ঠ সম্মেলনে সংস্কৃতিমন্ত্রী আসাদুজ্জামান নূর সভাপতিত্ব করবেন। ইউনেস্কো সদর দফতর থেকে এক ই-মেইল বার্তায় বিষয়টি সংস্কৃতিবিষয়ক মন্ত্রণালয়কে জানানো হয়েছে বলে গতকাল ৪ জুন রোববার মন্ত্রণালয়ের এক সংবাদ বিজ্ঞপ্তিতে একথা বলা হয়। সূত্র-সংবাদ (শেষ পৃ.,ক.৫), সমকাল (পৃ.৫,ক.১), ইন্ডিপেনডেন্ট (পৃ.২,ক.৬)।

৯। **রপ্তানিমুখী শিল্পের উন্নয়নে ১০ কোটি ডলার ঋণ অনুমোদন বিশ্বব্যাংকের**

রপ্তানিমুখী শিল্পে শ্রম দক্ষতা বাড়াতে ১০ কোটি ডলার ঋণ অনুমোদন করেছে বিশ্বব্যাংকের বোর্ড সভা। গতকাল ৪ জুন রোববার ওয়াশিংটনস্থ বিশ্বব্যাংকের সদর দফতরের এক সংবাদ বিজ্ঞপ্তিতে উল্লেখ করা হয়েছে, 'এক্সপোর্ট কম্পিটিভিনেস ফর জব প্রজেক্ট' এর মাধ্যমে গার্মেন্টস সেক্টরের বাইরে রপ্তানিমুখী চামড়া, পাদুকা প্লাস্টিক এবং হালকা প্রকৌশল শিল্পে শ্রমিকদের কর্মদক্ষতা বাড়াতে এ প্রকল্প সহায়তা করবে। এর ফলে গার্মেন্টস সেক্টরের

বাইরে এই খাতগুলোতে ৯০ হাজার কর্মসংস্থান তৈরি হবে। এ বিষয়ে বিশ্বব্যাংকের কান্ট্রি ডিরেক্টর চিমিয়াও ফান উল্লেখ করেছেন, চীনের পর বাংলাদেশ সবচেয়ে বেশি তৈরি পোশাক রপ্তানি করছে। রপ্তানি খাতের বহুমুখীকরণের মাধ্যমে বাংলাদেশ তার প্রবৃদ্ধিকে আরো এগিয়ে নিয়ে যেতে পারে। সূত্র-ইত্তেফাক (পৃ.১৮,ক.৬), সমকাল (পৃ.১২,ক.২)।

#### ১০। পাবনায় ৭ জন অ্যানথ্রাক্সে আক্রান্ত

পাবনায় অসুস্থ গরুর মাংস খেয়ে ৭ মাংস ব্যবসায়ী অ্যানথ্রাক্স রোগে আক্রান্ত হয়েছে। পাবনা জেলার ভাঙ্গুড়া উপজেলার ভবানীপুর ও হারোপাড়া গ্রামে এ ঘটনা ঘটেছে। গত ৩ জুন শনিবার ভাঙ্গুড়া উপজেলা স্বাস্থ্য কমপ্লেক্সে তাদের ভর্তি করা হয়েছে। উপজেলা স্বাস্থ্য কমপ্লেক্সের কর্মকর্তা ডা. ইতিয়ারা পারভীন ঘটনার সত্যতা নিশ্চিত করেছেন। ভাঙ্গুড়া উপজেলা স্বাস্থ্য ও পরিবার পরিকল্পনা কর্মকর্তা ডা. মো. শাহাদৎ হোসেন বলেন, ‘বিষয়টি সম্পর্কে আমরা অবগত আছি। আক্রান্তদের সঠিক চিকিৎসার জন্য প্রয়োজনীয় উদ্যোগ গ্রহণ করা হয়েছে।’ সূত্র-সংবাদ (শেষ পৃ.,ক.৩), জনকণ্ঠ (পৃ.১৪,ক.৭)।

#### সম্পাদকীয়

- ক. **ইত্তেফাক** : পুরান ঢাকার নিমতলীতে রাসায়নিক গুদামে ভয়াবহ বিস্ফোরণে অগ্নিকাণ্ডের ঘটনার সাত বছর পেরিয়ে গেলেও পুরান ঢাকার ঘনবসতিপূর্ণ আবাসিক এলাকা থেকে রাসায়নিক গুদাম ও কারখানা না সরানোয় উদ্বেগ প্রকাশ করে এ ব্যাপারে সংশ্লিষ্ট কর্তৃপক্ষের দৃষ্টি আকর্ষণ।
- খ. **সমকাল** : শরীয়তপুর জেলার সঙ্গে দেশের দক্ষিণ-পূর্বাঞ্চলের যোগাযোগ রক্ষাকারী শরীয়তপুর-চাঁদপুর মহাসড়কের বেহাল দশা নিরসনে দ্রুত কার্যকর পদক্ষেপ নেওয়ার ওপর গুরুত্বারোপ।
- গ. **প্রথম আলো** : নাটোর সদর উপজেলার চক আমহাটি গ্রামে আইন-শৃঙ্খলা বাহিনী কর্তৃক কয়েকজন কিশোর ও যুবক আটকের পর তাদের ছাড়াতে ৫০ হাজার টাকা দাবির ঘটনায় নিন্দা জানিয়ে আইন-শৃঙ্খলা বাহিনীর এ ধরনের অনৈতিক কর্মকাণ্ড রোধে তাদের প্রতিটি কার্যকলাপ জবাবদিহিতার আওতায় আনার সুপারিশ।
- ঘ. **ইনকিলাব** : অনলাইনে কেনাকাটা বাড়ার সুবাদে অনলাইন বাজার সম্প্রসারিত হওয়ার কথা উল্লেখ করে এক্ষেত্রে পণ্য বিক্রয়কারীদের পণ্যের মানের ব্যাপারে স্বচ্ছতা ও সততার পরিচয় দেওয়ার আহ্বান।
- ঙ. **ইন্ডিপেনডেন্ট** : এনবিআর এর গ্যাসের ওপর বর্ধিত হারে করারোপের প্রভাবে অন্যান্য পণ্য সামগ্রীর মূল্য বৃদ্ধির আশঙ্কা করে জনগণের ক্রয়ক্ষমতার ওপর ভিত্তি করে গ্যাসের মূল্য নিয়ন্ত্রণে রাখার সুপারিশ।
- চ. **ডেইলি সান** : বুড়িগঙ্গা নদীকে দূষণের হাত থেকে সুরক্ষা করতে শিল্প ও গৃহস্থালী বর্জ্য নদীতে ফেলা সম্পূর্ণরূপে বন্ধ করাসহ এ বিষয়ে দীর্ঘমেয়াদী পরিকল্পনা নেওয়ার আহ্বান।
- ছ. **ডেইলি স্টার** : জনস্বার্থে রাজধানীর ধোলাইখালকে দখলের হাত থেকে উদ্ধার করে ব্যবহার উপযোগী করার ওপর গুরুত্বারোপ।
- ঝ. **নিউ এজ** : ফুটওভারব্রিজ ও আন্ডারপাস ব্যবহারে পথচারীকে সচেতন করে তুলতে সংশ্লিষ্ট কর্তৃপক্ষকে সচেতনতা বৃদ্ধিমূলক কার্যক্রম জোরদার করার আহ্বান করে সম্পাদকীয় প্রকাশ করেছে।

#### উপ-সম্পাদকীয়

**ইনকিলাব** পত্রিকায় প্রকাশিত কলামে প্রাকৃতিক দুর্যোগ থেকে পরিত্রাণ পাওয়ার জন্য বনাঞ্চল সম্প্রসারণ করার বিকল্প নেই বলে উল্লেখ করা হয়েছে।

#### নিবন্ধ ও ফিচার

**ইত্তেফাক** পত্রিকায় প্রকাশিত ‘পাহাড়ে শান্তির সুবাতাস বয়ে যাক’ শিরোনামের নিবন্ধে পাহাড়ি-বাঙালি দ্বন্দ্ব নিরসনে এবং পার্বত্য শান্তিচুক্তি বাস্তবায়নের জন্য সবার ঐকান্তিক প্রচেষ্টাই গুরুত্বপূর্ণ বলে অভিমত প্রকাশ করা হয়েছে।

#

শুকলা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা

